

GO NAGANA KA DITSELA TŠA RENA

 . . . Cleveland, Tennessee, moo ke nago le bagwera ba bantši ba bohlokwa, bagwera ba Morena Jesu ba dikereke tšohle tša kerekeleina, gomme ge ke kwele gore ke be ke, ke bile le sebakabotse go boela gape Cleveland, pelo ya ka e be e nno huduega go tla mo go ba le ngwanaborena yo bohlokwa, wa go hlomphega, Ngwanešu Littlefield. Gomme ka gona, ge e sa le ke etla sefaleng go hwetša Ngwanešu Cook, le Ngwanešu Hall, le badiredi ba bangwe ba bantši mo, ba lego ba bohlokwa, bagwera ba hlogo ya kgomo go nna. Gomme go tseba gore re na le ditirelo tše kgolo pele, re letetše dilo tše kgolo go tšwa go Morena.

² Gomme re nyaka go romela madume a go ikgetha go bao ntle ka lefaseng la seyaalemoya: Re duma ge nkabe le be le le mo bošegong bjo go lebelela godimo ga ditetelo tša . . . godimo ga difahlego tša batho ge ba dutše, ba letile, boka feela se sengwe se ka direga nako efe kapa efe. Digatiši di a kitima, gomme batho ka difene tša bona di futhela, gomme, eupša ka go yona yohle, go bonala go le tebelelo ye kgolo go batho ba letetše se sengwe go direga.

³ Ke a bona ba thoma go tliša balwetši ka gare godimo ga dikhote, le ditulo tša bagolofadi, le go ya pele. Re letetše go ba le tirelo ye kgolo ya phodišo mo, Morena go kopana le rena, le go šegofatša batho ba Gagwe bjalo ka ge A tshepišitše go dira.

⁴ Ke a dumela gore ba fa seo gosasa bošego go thoma ditirelo tša phodišo. Ka gona bašemane ba tla be ba efa dikarata tša thapelo gare ga masometharo a tshela le iri ya bošupa gosasa morago ga sekgalela, gore re kgone go boloka batho ba lokologantšwe ka tshwanelo mo sefaleng bakeng sa tirelo ya phodišo. Gomme ka gona, gape, bošego bjo bo latelago, Laboraro bošego ke go ba tirelo ye nngwe, ye re e bitšago tirelo ya phodišo.

⁵ Ga re re ka seo gore re ya go fodiša e ka ba mang, re dumela gore, ka mogau wa Modimo re ya go ba dira ba tsebe gore Modimo o šetše a ba fodišitše, gomme ba no ba go e amogela nako yeo. Feela bjalo ka ge re leka go dira modiradibe a tsebe gore Modimo o a mo rata, gomme O šetše a mo phološitše, ge a ka no e amogela. Ke mošomo wo Kriste a o feditšego kua Khalibari ge A dirile Lentšu lela la go lekanela gohle go re, “Go fedile.” Polane ka moka ya phološo, tšohle tšeo di ka direlwago batho ka pelo ya Modimo di be di fedile ge Kriste a boletše Mantšu ao, polane ya Modimo e ile ya felela. Re no swanela go ba le tumelo go amogela se A re fedišeditšego sona.

⁶ Gomme ka gona, ke a dumela ke Laboraro mosong e bile le lengwe la mabaka a magolo ao ke lego mo, go gafela tabarenekele ye go Morena, tabarenekele yeo Ngwanešu Littlefield, ke a nagana, a tla bago modiša wa yona. Yeo e tla ba iri ya lesome Laboraro mosong.

⁷ Gomme ke tla rata go bona Mokriste yo mongwe le yo mongwe yoo a ka kgonago go pitlagana ka mabotong a tabarenekele yela, a le fale, ka gore ga re nyake feela go gafela tabarenekele go Morena le go tirelo ya Gagwe, eupša re nyaka go gafela maphelo a rena beng go Yena ka tirelo. Ka gore kereke e no direla morero go šireletša batho, eupša ke rena Kereke, bakgethiwa ba Kriste ka mogau wa Gagwe, gomme re nyaka go ikgafela ka borena ka boswa ka Laboraro molaodi wa gago go go bakeng sa tirelo ye. Ge o šoma, kgopela molaodi wa gago go go tlogela feela gannyane nthatana bakeng sa nako ye, Ke a dumela o tla e dira, ka gore ye e tla ba nako ye kgolo go rena bohle.

⁸ Gomme bjale, bošegong bjo, e bile monyetla wa ka, gomme, go fiwa nna ke ngwanešu go tla le go bolela le lena dinakwana di se kae ka Mangwalo.

⁹ Bjale, go na le e ka ba mang yoo a kgonago go gogela matlakala a Beibele morago, a ka bula Beibele, eupša go na le yo Motee feela Yo a lekanetšego go bula Beibele go rena, yoo ke Kriste. Ka Mangwalong go ngwadilwe: “Gomme go be go se yo a hweditšwego ka Legodimong, go se yo motee lefaseng, goba ka tlase ga lefase, yo a bego a ne maswanedi go tšea Puku, goba go tlemolla mahuto a yona, goba ebile go lebelela ka go yona. Gomme go bile le Kwana e tlile ka seswantšhong yeo e bolailwego go tloga motheong wa lefase. Gomme O tšere Puku go tšwa seatleng se setona sa Yena yoo a dutšego godimo ga Terone, gobane O be a ne maswanedi.” A nke A Le bule go rena bošegong bjo ge re theetša ka kgotlelelo.

¹⁰ Gomme pele re e dira, a re inamišeng dihlogo tša rena le go bolela le Mongwadi wa Puku ye, Beibele.

¹¹ Morena, ga go mantšu ao re ka kgonago go a hwetša ka maleme a batho ao a ka kgonago go hlagiša tumišo ya rena go Wena, ka gore ka therešo ke ka pelo ya rena ka moka re a Go boboela, O Morena Modimo, Mohlodi wa Magodimo le lefase, mothomi wa Bophelo bjo bosafelego, le Mofi wa mpho ye nngwe le ye nngwe ye botse le go phethagala. Gomme re thabile kudu bošegong bjo, gore re na le menyetla ya go bitšwa bana ba Gago, barwa le barwedi. Gomme re tla re, Morena, gore go kgole le dipelo tša rena go tsoge ra nagana gore re ne maswanedi a se ka tsela e ka ba efe, eupša e bile ka mogau wa go se otswafatšwe wa Jesu Kriste Yo a re bileditšego go le legolo le, lefelo la kgetho, gomme ka se, re tshepišitšwe gore re ne Bophelo bjo Bosafelego gomme re tla tsošwa mo matšatšing a mafelelo.

¹² Re lebeletše pele go nako yeo ge Morena, Yenamong, a tla fologa go tšwa Magodimong ka mokgoši, le phalafala ya Modimo, gomme ba ba hwetšego go Kriste ba tla tsoga, gomme ka gona rena ba re phelago le go šala re tla fetolwa ka nakwana ka panya ya leihlo, gomme ra ubulelwa godimo mmogo le bona go Mo gahlanetša sebakabakeng. Seo se tsikinyago dipelo tša rena gakaakang!

¹³ Morena, re tla rapela bošegong bjo gore batho ba ba dirilego sehlabelo sa go tla tirelong, gore O tla romela yo mongwe le yo mongwe wa bona go tšwa fa a tletše kudu ka botho bja Gago le dikgaogelo tša Gago, go fihla letšatši lohle gosasa le gohle go kgabola bošego pelo ya bona e tla opela ditumišo go Wena.

¹⁴ Re ka se lebale bao ba golofetšego le go tlaišwa, balwetši ka mmeleng bao ba robetšego fa godimo ga maako le go dula ka ditulong ntle fale, bao ba hlokago mogau wa Gago go ba fodiša. Re a rapela, Morena, gore go ka se be le motho yo motee wa go fokola magareng ga rena ge tirelo ye e tswaletšwe. A nke modiradibe yo mongwe le yo mongwe a phološwe le bakgelogi ba biletšwe morago ntlong ya Morena, morago ka kopanelong le Morwa wa Gagwe.

¹⁵ Gomme re ka se lebale bao ba lego lefaseng la seyalemoya bao ba theeditšego, le dipetlele, le dikolong tša bao ba fokolago, le e ka ba eng e ka bago, a nke Moya wo Mokgethwa wa Gago o ye go kgabola tshepetšo ya seyalemoya se le ka diphapošing tša bona, le go ba fa, Morena, tlala yela le lenyora ka pelong ya bona, gore ba ke ba kgotsofale ka botho bja Gago.

¹⁶ Ge re phetla morago matlakala a Puku go bala, a nke Mongwadi wa Puku a romele Moya wo Mokgethwa wa Gagwe le go dira wona Mantšu go phela go rena, ka tsela ye e lego gore re tla amogela se re se tletšego. Re fe mogau wa Gago le maatla a Gago, tebalelo ya dibe tša rena. Ka gore re a e kgopela, Leineng la Jesu, Morwa wa Gago, Mophološi wa rena. Amene.

¹⁷ A nke Morena a le šegofatše yo mongwe le yo mongwe. Feela bakeng sa nako ye kopana, ke naganne ka Lengwalo tsoko ge ke etla godimo morago ga sekgaalela se, gomme le hwetšwa godimo ka go Dipesaleme, 119 Pesaleme gomme te—te temana ya 59, ke rata go bala.

*Ge ke be ke nagana ka ditsela tša ka, ke retolletše
maoto a ka go mabopaki a gago.*

¹⁸ Gomme bošegong bjo, ge nka e bitša thuto, ke tla rata go bolela ka thuto: *Go Nagana Ka Ditsela Tša Rena.*

¹⁹ Le a tseba, Dafida, ke a botšwa ka nako ya go ngwalwa ga Pesaleme ye, gore o be a le bothateng. Gomme Dafida o be a no ba monna boka rena bohle, yoo a bilego le merotoga le metheoga ya gagwe, le diphapano tša gagwe. Gomme o be a le bothateng kudu.

20 Modimo ga se a tshepiša go ya go kgabola bophelo, modumedi e ka ba ofe go ya go kgabola ntle le mathata, eupša O tshepišitše mogau go lekanela go hlokomela mathata a. Seo ke se se tsikinyago pelo ya ka, ke go tseba gore mogau wa Gagwe o lekanetše. Mabotebo ohle a rena, le—le mathata, le dikgakanegokgolo, efela Modimo o tshepišitše go re bona re kgabotše. Seo e no ba bontši bjo re ka kgonago go Mo kgopela, go tsebeng gore O tseba tsela.

21 Bjalo ka ge Joshua a boletše go Israele, “Ga se wa sepela ka tsela ye pele.” Ga se ra e sepela, kafao, O tseba tsela gomme o kgona go e šupetša.

22 Ke kgona go no bona Dafida, ntlo ya gagwe e be e beilwe leihlo, Saulo le madira a gagwe ba be ba beile ntlo ya gagwe leihlo go mmolaya, Ke kgona go bona Dafida ge a fogohla diatla tša gagwe ka letšhogo le go sepelela morago le pele, pele le morago go kgabola kamora ya gagwe, a lebeletše ntle ka mafastere le go bogela mosepelo wo mongwe le wo mongwe wo monnyane ka sethokgweng, ka gore o be a sa tsebe gore ke nako mang ge mosebe o ka phatšago moyeng thwi go ya sehubeng sa gagwe.

23 Gomme e bile nako yeo mo mantšu a a tlilego: “Ge ke be ke nagana ka ditsela tša ka, ke retolletše maoto a ka go mabopaki a Gago.”

24 Ke ka mehla ge monna a le bothateng, ke gona ge a eya go nagana ka Modimo. Go befile kudu gore re swanetše go leta go tsena bothateng pele re nagana ka Yena. Eupša ke kwele batho ba bantši bao, ba mmalwa ba ba tleleimilego gore ba be ba se badumedi, gore ba be ba sa dumele go be go le Modimo, eupša ke lemogile batho bale ba go swana, a nke ba gobatšwe goba ka bothateng. . .

25 Bjalo ka ge re botšwa, Bob Ingersoll, ge a be a ehwa ka kamoreng ya gagwe ya sepetlele, o goeditše, “O Modimo, ge go na le Modimo, nkgaogetse!” O ka no bolela dilo tše dingwe tše kgolo ge o ikwela gabotse, eupša ge lehu le etla le kokota lebating, o ya go fetola kgopolo ya gago.

26 Mo boteleleng bja matšatši a ka, ke bone banna ba bantši ba ba bjalo bao ba bego ba sa iše felo ka kereke, gomme ba bego ba sa iše felo ka Modimo, gomme—gomme go se selo se lokilego, eupša e no ba lesa ba tsene bothateng, ngaka o re, “Go na le kankere e a go tseketlanya,” ba tla ya go tsoma yo mongwe go ba rapelela, thwi ka pela. Modimo o na le tsela ya go go dira o Mo lemoge.

27 Dikgwedi di se kae tša go feta, ke be ke bolela le moahlodi wa go hlomphega wa toropokgolo ya rena, yo e lego mogwera wa ka wa hlogo ya kgomo yo a tlogo ka setlwaedi go tabarenekele ge ke le kua, Moahlodi Bottorff wa Jeffersonville, Indiana. Gomme

ke be ke bolela le yena ka mo—mo mošemane wa mme yo a bego a le godimo kua bakeng sa go utswa koloi.

28 Gomme ke boletše le mošemane ka botelele, gomme o beile matsogo a gagwe go ntikologa, gomme o rile, “Ngwanešu Branham, ge o ka hwetša moahlodi go ntshwarela nako ye nngwe gape,” o rile, “ke tla—ke tla go tshepiša, ke tla—ke tla tšea lefelo la ka ka sekolong sa Lamorena, gomme ke—ke tla ba fao nako le nako ge mojako o bulega.”

29 “Gabotse,” ke rile, “morwa, ke kgopetše moahlodi bontši bja dikgaogelo, gomme eupša, o a tseba, o ka tlase ga keno, gomme o—o swanetše go dira toka, eupša ke tla ya go bolela le yena.”

30 Gomme ke rile, “Moahlodi, Wena Mohlomphegi, mohlomphegi, a go ka kgonega gore o ka lebalela lesogana le gape? O mpoditše o tla. . .” dilo *tše bjalo le bjalo* o tla di dira.

31 Nka se tsoge ka lebala se moahlodi a se boletšego, o nno phagama go tšwa ka morago ga teseke ya gagwe, gomme a sepela go dikologa godimo moo ke bego ke le gomme a ntšea ka seatla, gomme ke emeletše, a bea matsogo a gagwe godimo ga legetla la ka, gomme o rile, “Billy,” o rile, “motho yo mongwe le yo mongwe yoo ke mo ahlolago kgolegong o nyaka go ba moreri, o bothateng. Eupša,” o rile, “ke bone ba bantši ba bona ba swarelwa le go hlankela nako ya bona, ba lebala tšohle ka yona ge ba lokologa gape.”

32 Gantši ke nakong ya mathata moo motho a nyakago Modimo.

33 Israele, ge Israele e be e tsena bothateng, ke gona a bego a tla nyaka Modimo. Ge Bafilisita ba be ba le godimo ga bona, gomme ge ma—ma madira a Basiria a be a ka kampa go dikologa, morago ba tla retologa le go tšea areka ya kgwerano, gomme ba e tliša ntle, gomme ba opela dipina, le go neela dihlabelo. Eupša morago, ge Modimo a ba šegofaditše, gomme ditlhoko tša bona tšohle di filwe, ke moka thwi morago, boka kolobe lerageng la yona, le mpša mahlatšeng a yona. Go no bonala o ka re woo ke mokgwa wa batho, ba swanetše go kgoromeletšwa ka go se sengwe, ba kgoromeletšwa go rapela Morena.

34 Ge re ka dula fase bošegong bjo le go eleletša, ke eng selo e ka ba sefe se segolwane go feta Bophelo bjo Bosafelego? Mpotše ke mohuta ofe wa poreisi yeo o kago go e bea go Bophelo bjo Bosafelego. Ge o be o ehwa bošegong bjo, ka dibilione tše lekgolo tša ditolara ka potleng ya gago, e be e ka se kgone go kgwatha Bophelo bjo Bosafelego, o ka se kgone go Bo reka. Tšhelete ke ditšhila pele ga Modimo ge e se ya šomišetšwa Mmušo wa Gagwe goba go taba ye nngwe ye botse.

O nagana gore go tla direga eng bošegong bjo ka Wall Street. . . ?

35 Go na le mafelo ka lefaseng moo ke rerilego ao a lego segologolo go fihla ba tsoma digahla tše nnyane tša dikgopawatle

mo lešing la lewatle, ba di betla, gomme seo ke se ba se šomišago bakeng sa tšhelete. Gomme morago ke rerile ka mafelong moo ba tšerego meno go tšwa go diphoofolo, gomme ba tla a tliša gomme ba a gwebišana, gomme ke tšhelete.

³⁶ O nagana ke eng bošegong bjo seo Wall Street e tla se naganago ge banna ba ba ka tla mebarakeng ya bona, gomme ba bea digahla tša dikgopawatle, le meno a go nkga go tšwa go diphoofolo, gomme ba nyaka go a gwebišana bakeng sa diponte tša rena tša gauta? Gobaneng, ba be ba tla re, “Tšeang dilo tšela tša go nkga gomme le tšweng fa.”

³⁷ Seo ke se tšhelete ya rena le bogolo bja rena bo lego pele ga Modimo. Re ka se kgone go Bo reka! Modimo o lokile kudu go fihla A re fa Bjona ntle le tšhelete goba ntle le tefo, gomme re a Bo gana. Ebile ga e kwagale go hlamatsega, a e a dira?

³⁸ Ke be ke bolela le mogatšaka matšatši a se makae a go feta morago ga ge ke ketekile letšatši la ka la bomasometlhano, gomme ke rile go yena, “Hani, ke a tšofala. Beibele ye, ke swanetše go e bea morago ka diatleng tša mošemane wa ka, letšatši le lengwe.” Gomme ke be ke bolela le yena ka fao ge re be re le ba baswa. Gomme ke rile, “Fa, re nyalane mengwaga ye yohle, gomme go bonala eke go be go no ba maabane.”

³⁹ Gomme ke rile, “Bophelo bo fetile ka pela kudu, eupša hani, theetša se:” ke rile, “Ge Modimo a ka tla go kamora ye gomme a re, ‘Ke ya go go fa kgetho: go phela mengwaga ye mengwe ye masometlhano, gomme o ya go feta ka gare ga bohloki, le bolwetši, le mathata, le go ganwa le go nyatšiwa, le go ba le nako ye šoro, o ya go swanela go kgopela dijo tše dingwe le tše dingwe tšeo o di jago mo mengwageng ye masometlhano ya go latela, eupša mafelelong a mengwaga yela ye masometlhano, o tla ba le Bophelo bjo Bosafelego. Eupša Ke ya go go fa lefase ka moka le tšhelete yohle, le go go bušetša morago go bogolo bja mengwaga ye lesomeseswai, le go go dira kgoši godimo ga lefase lohle lebaka la mengwaga ye milione, eupša mafelelong a mengwaga ye milione, gona, yeo ke phetho.’”

⁴⁰ Ke tla re, “Morena, a nke ke kgopele goba e ka ba eng, nno mpha Bophelo bjo Bosafelego.” Gobane go tla ba le nako yeo nka se sa bago gona, eupša ge feela go na le Modimo ka Legodimong, ge ke na le Bophelo bjo Bosafelego, ka mehla ke tla phela le Yena. Ge dinako tše telele kudu di fetile, re phela go ya pele, gobane re karolo ya Modimo, barwa le barwedi ba Gagwe.

⁴¹ Gomme ke dihlong gore re swanetše go ka gatelelwa ka mafelong go re dira gore re e amogele. A lenaba le re nago nalo! Ee, lenabalegolo. Gomme go botse go retologela go Morena pele mathata a a hlasela. Bjale, nako ye ntši ke yona, gore ke mathata ao a dirago batho go tla go Morena, eupša re swanetše go tla pele a ratha.

Bjale, mohlala go swana le ka matsatšing a, a Mokriste e ka ba mang yo re nyakago go mmea pele ga rena . . .

⁴² Ke be ke nagana ka kanegelo, nako ye nngwe ya go feta, godimo ka Northwoods, go be go le mo—mo mošemane wa lekhalate, o be a na le e ka ba mengwaga ye masomepedihlano, gomme o be a no ba mohuta wa motsekelli, re ba biditše. Gomme o be a le mokgomana, eupša e sego mo—mo moneneri goba legwaragwara, eupša o be a le—o be a le mokgomana, eupša feela mothaka yo a ratago go tsekella gohle, go se lefelo go ya, gomme go se selo go dira. Yeo ke tsela ya go šiiša go tšea bophelo.

⁴³ Ke file monna matena a gagwe nako ye nngwe ya go feta, e be e le hopo, gomme ke rile, “O thomile se neng?”

O rile, “E ka ba mengwaga ye masomepedi ya go feta.”

Ke rile, “O ya kae?”

O rile, “Ga ke ye felo.”

Ke rile, “Gona o tšwa kae?”

O rile, “Oo, ga ke tšwe felo.”

Ke rile, “O letetše go tšwetša pele se nako ye kaakang?”

⁴⁴ “Oo,” o rile, “ga ke tsebe.” Ga—ga a na maikemišetšo. Gobaneng, Mokriste o swanetše go ba motho wa maikemišetšo kudu lefaseng! Tlišang Ebangedi ye ya letago ya Bophelo bjo Bosafelego go lefase le le hwago le le senyegago. Re swanetše go ba godimo le go yona.

⁴⁵ Lesogana le le hlehletše ka Northwoods go naga ye ke bego ke tsoma ka go yona mengwaga ye mentši ya go feta, go tsoma tshepe. Gomme ge . . . O be a nyaka mošomo, o be a se na le tšhelete ye e itšego, gomme—gomme molaodi wa dithokgwa a mo hira go thuša wa go tšofala, moapei wa makhalate.

⁴⁶ Gomme bošego bjo bongwe ka morago ga ge selalelo se fedile, gomme dibjana di hlatswitšwe, ba robetše ka kamoreng ye nnyane ya ka morago ka feela seila ye nnyane magareng ga bona, gomme ka pelapela, moisa yo moswa o rile, “Ke ile ka tsošwa, gomme ke kwele banna ba babedi ba eme kgauswi le lefastere la ka, gomme go be go le modumo wa selo kudu nkilego ka ke ka se kwa.” O rile, “Ke lahletše lepai morago go tloga sefahlegong sa ka le go tabogela godimo, ka pela.” Gomme o rile, “Kamora e be e no ba seetšeng kgafetšakgafetša go tšwa go legadima le gadima.”

⁴⁷ O rile, “Ke kwele banna bale ba babedi ba re, ‘Gabotse, Jim, bokaone re ye morago tlase kampeng, gobane re ka no se be fa mo metsotsong ye lesome gape, mamogašwa wola o lebantše mo.’”

⁴⁸ O rile o tabogetše godimo, gomme o lebeletše ntle ka lefastere mo nakong go bona ntikodiko ya maru ye kgolo yela ya go swana le noga e gagola dithaba, e gagola dihlare le go di phetla moyeng. Ge a bone mebele ya mehlare ya go tlala e fofa makgolo a dikgato

ka moyeng, e leba thwi thoko ya ntlo ya dikota, gomme o rile o kwele se sengwe se kokota godimo ga diseila, gomme moapei wa kgale ka lehlakoreng le lengwe la seila o rile, "Morwa, etla godimo ka lehlakoreng le, ke na le lantere e goteditšwe." O rile o ile godimo ka lehlakoreng le lengwe, gomme moapei wa kgale o be a goteditše lantere, gomme o rile o rile go yena, "A o tseba Morena Jesu bjalo ka Mophološi wa gago?"

O rile, "Aowa, meme, ga se nke ka rapela bophelong bja ka."

⁴⁹ "Gabotse," o rile, "bokaone o rapele, gobane re ka no swielwa go tloga lefaseng mo metsotsong e se mekae ya go latela." O rile mokgekolo yola wa bomodimo, yo mokgethwa, o khunamile fase kua ka lepokisi lela la sešepi gomme a rapela, feela go iketla ka mo a bego a kgona go ba.

⁵⁰ Gomme o rile, "Ga se ke kgone go rapela," o rile, "Nako le nako ke tla thomago go re, 'Morategi Modimo,'" o rile, "e ka ba ka nako yeo mohlare o tla kotama kgahlanong le ntlo ya dikota." O rile go nna, o rile, "Moruti, ke be ke tšhogile kudu go rapela." Gomme o rile, "Ke na le bontši bjo ntle: 'Mohlomphegi, ge O ka no mpoloka, ke tla tla go Wena nako ye nngwe ge go se ledimo godimo.'"

⁵¹ O rile, "Ke ka lebaka leo ke lego fa bošegong bjo, ga go na ledimo le kgatlampanago, eupša tshepišo yela ka pelong ya ka, gomme megopollo ya iri yela e sa selaganya."

⁵² Go lokile go tla go Modimo ge o sa itekanetše le ka monaganong wa gago wa maleba, ge se sengwe le se sengwe se homotše. Ge o na le nako ya go nagana le go tla ka tlhaologanyo le go hlapogelwa, yeo ke nako ya go tla go Modimo, ka gore gona Yena ke Thušo ye e lego gona ka nako ya bothata.

⁵³ O rile a ka se tsoge a lebala gore mokgethwa yola wa kgale o rapetše bjang feela ka tlhomphokgolo ka thelelo le go homola ge ledimo lela le be le kgatlampana. Go ra se sengwe go tseba Modimo, go ba komana bakeng sa sona ge se etla, gona Yena ke Thušo ye e lego gona ka nako ya bothata.

⁵⁴ Ke a elelwa e sego mengwaga ye mentši kudu ya go feta ka Northwoods, mme wa ka ke seripa sa Moindia go tšwa go lefeloboloto tlase fa, gomme ke naganne ke be ke le monna wa sekgwa kudu go tsoge ka lahlega, gomme ke be ke sa tšo nyala, gomme se se lebega boka go sotla mogatšaka, eupša go hanimune ya rena, ke mo tšheetše leetong la go tsoma. Gomme ke . . . O be a dula ka lekubeng le lennyane leo re tlilego ka go lona mosong wola.

⁵⁵ Ke rile, "Ke a dumela go na le mohlala wa bera ke o lemogilego ge ke rotoga." Ke rile, "Ke tla ya go lota bera yela mohlala, gomme ke tla bowa e ka ba ka sekgalela." E be e ka ba ka iri ya senyane mosong.

56 Ke bile ka mohlaleng wa bera yela, gomme ke ile ka hlhlwa gohlegohle dinageng, mafelelong, o ntimeletše. Gomme ke be ke etla godimo ga thapo ye nnyane, gomme ke lemogile tshepe, ke rile, “Yeo e tla ba ye botse go e tšeela gae.” Kafao ke thuntše tshepe, ka thoma go boela morago. Gomme ke lemogile maru a be a thomile go ba fase, kgudi e etla ka gare.

57 Ge e ka ba mang a tseba se go se rago go ba ka dithabeng ge kgudi e etla, o no swanela go dira ntlwana, ga o tsebe mo o yago. Ke tsebile ke ile ka swanela go ya morago, mogatšaka ga se a ke a tsoge a ba ka dithokgweng. Gomme ka thoma go hlaganela, gomme ka sepelela gomme ka sepelela godimo ga moela wo monnyane, gomme ke rile, “Ke a tseba bjale gore moela wo, moo o dirago khona, ke moo ke tshelago godimo, ka ya tlase ka lehlakoreng le lengwe,” gomme ke tsebile mokgwa wa go tšwela ntle.

58 “Gabotse,” ke naganne, “Go lebega o ka re ke swanetše go ba, khona yela.” Gomme ke eme, gomme ke thomile go fufulelwa, gomme ke be ke eme thwi hleng le lehlakore la tshepe ya ka gape, ke tla thwi morago go e dikologa. Ke dirile seo makga a mararo. Bjale, Moindia o bitša seo mosepelo wa lehu, o sepela ntikodikoko. Eupša o ya ntle kae? Gabotse, ke bone ke lahlegile, eupša ga se ke nyake go e amogela.

59 Yeo ke tsela ye batho ba lego, ga ba nyake go amogela gore ba phošong. Ga go pelaelo banna le basadi ka moagong wo bošegong bjo, goba ntle ka lefaseng la seyaalemoya bao ba sego ba loka le Modimo, eupša ga le nyake go e amogela, le e khupetša ka go ya kerekeng, goba go bolela mohuta tsoko wa thapelo goba thutotumelo. Seo ga se ye thwi le Modimo, go tswalwa gape, go ba morwa goba morwedi wa Modimo, tseo ke dinyakwa tša Modimo. Eba thwi le Yena.

60 Ka gona ka sepelela kgojana, gomme ka re, “Oo, ke nna monna wa lešoka gabotse kudu go ka lahlega.” Ke rile, “Bjale, Bill Branham, nno hlapologelwa. O lešilo, o tseba mokgwa wa go tšwela ka ntle ga fa, eya pele.” Gomme go be go le kgudi kudu, ke be ke sa kgone go bona selo.

61 Gomme ke thomile go sepela, gomme morago ga lebakana, ke tšwetšepele go kwa Lentšu, “Ke nna yona Thušo ye e lego gona ka nako ya bothata.” Ke sepeletše kgojana gannyane, gomme go fihlile gore ke kgone go Le kwa le bolela: “Morena ke Thušo ye e lego gona ka nako ya bothata.”

62 Gabotse, ke naganne. . . Ke khunamile fase gomme ke rile, “Morena, ke a amogela gore ke lahlegile. Ga ke na maswanedi go phela, eupša mogatšaka le Billy, le lennyane, lesea la go anywa, ba ne maswanedi go phela, Morena, o se ba lese ba senyega.”

63 Gomme ke rapetše, gomme ke emeletše, gomme ke rile, “Gabotse bjale, ke tla swanela go kgetha bokaonekaone bjoo ke tsebago bjang.” Kafao ke thomile go sepelela pele ka go otloga,

ke naganne, “Ke ya thwi, nnete tlwa, phefo e ka sefahlegong sa ka.”

⁶⁴ Gomme feela nako yeo go bonagetše gore seatla se be se robetše godimo ga legetla la ka, gomme ke retologile go bona ke Mang A nkgwathilego, gomme ka lebelela godimo, gomme lefelo le lenyenyane le apogile magodimong, gomme ke bone Thaba ya Hurricane le tora ya molemiši, moo ke bego ke eya. Oo, a maikutlo! Yena ke Thušo ye e lego gona ka nako ya bothata. Eba thwi le Yena bjale, gore ge lehu, goba bolwetši, goba e ka ba eng e lego e go hlasela, gona ke Yena Thušo ye e lego gona.

⁶⁵ Ga se nke ka lebala, ke šupile diatla tša ka thwi go leba tse—tse tsela ye ke bego ke eya, ge nkabe ke ile ka tsela ye kgetho ya ka e bilego, nkabe ke ile ka Canada. Eupša ke be ke, ke ile ka tsela *ye*, go la ka le letona moo A nthetolotšego. Gomme ke išitše diatla tša ka godimo.

⁶⁶ Go thomile go ba leswiswiswisi, ke sepetše lebaka la diiri tše tharo, go nyakile go ba leswiswi, gomme morago go bile leswiswi, ke be nka se kgone go bona lethale la tora leo le kitimago go tloga toreng go theoga go ya lekubeng, e ka bago dimaele tše tshela. Gomme ke tsebile ke be ke le godimo ga Thaba ya Hurricane, ke be ke sa kgone go fetola tsela ya ka, go kitimela godimo ga matlapa. Oo, ke tsela ya makgwakgwa ge o leka go ya go la go ja nako ye nngwe, eupša ke nnete, ke tsela e nnoši go tšwa. Ke sepetše, ka morago ga ge go bile leswiswi, ke išitše diatla tša ka godimo go fihla di kwagetše o ka re di be diba eya go rotha. Oo, di be di tonya, gomme lehlwa le tšutla, gomme ke naganne, “Ge nka no kgona go kgwatha lethale lela!” Leswiswi kudu, gomme ke tla ema gomme ke khutšiša diatla tša ka nakwana, go boloka tsela ya ka e beilwe gabotse, morago ke emiša diatla tša ka gomme ke thome gape.

⁶⁷ O ka se tsoge wa tseba ka fao ke ikwetšego ge seatla sa ka se kgwathile lethale lela. Ke tsebile nka kgona go swarelela go lethale lela! Ke thušitše go le bea godimo kua seruthwana sela. Nka kgona go swarelela go lethale lela, gomme thwi mo bofelong bja tsela ya lethale lela moo le emego, go letile baratwa ba ka; seo e be e le selo se sengolo.

⁶⁸ Eupša ke be ke lahlegile gampempe go feta letšatši le lengwe, ge seatla sa lerato se nkgwathile pelong gomme sa nthetolla go leba Khalibari, ke išitše diatla tša ka godimo go fihla Sengwe se ntshwere. Ke swareletše go Sona ka tlhomphokgolo, ke sepela ka setu le ka go nokologa. Letšatši le lengwe mo bofelong bja Mothalo wo go tla letela baratwa ba ka le Morena wa ka. Yena ke Thušo ye e lego gona ka nako ya bothata.

⁶⁹ E bile Jobo ka mathateng a gagwe . . . Pele mathata a gagwe a mo hlasela, o rile, “Mohlomongwe, bana ba ka ba ka be ba dirile sebe, kafao ke tla neela moneelo wa go tshungwa bakeng sa bona.” O dirile ditokišetšo, ge eba e ka ba eng e diregile, ge a

thoma go nagana ka ditsela tša bana ba gagwe, ba ka no ba ba ile ba fapoga go thuto ya gagwe.

⁷⁰ Gomme a nke ke bolele se ka tlhomphokgolo le ka tlhompho: Ge bomme ba ba Amerika le botate ba ka bea nako ye ntši go rapelela bana ba bona boka Jobo a dirile, go seleka ga baswago go tla fokotšega. Bothata bja yona ke bomme le botate ba rena ba sebjalebja ba Amerika ba ba hlalela go go nwa, le go bapaleng karata, le go kgoga sekerete, le dilo tša mohuta woo, tše di dirago go seleka ga baswa. Ka kgonthe ga se go seleka ga baswa, ke go seleka ga batswadi. Ba hlokomologa go tla go Modimo le go Mo hwetša, ke moka bothata bo a hlasela.

⁷¹ Ge bothata bo hlasetše Jobo, o be a neetše moneelo wa go tshungwa, a etla godimo ga mabala a nnoši ao Modimo a tla amogelago modumedi, seo ke godimo ga sehlabelo sa go tshungwa le madi. Kafao ge bothata bo hlasetše ntlo ya gagwe, Modimo o be a le Thušo ye e lego gona mo nakong ya bothata.

⁷² Ge ba mo pharile molato wa go ba modiradibe wa sephiri, o tsebile gore o be a lokile le Modimo, gobane o be a kgotsofaditše dinyakwa tša Modimo. Ka gona o kgonne go re, “Ke a tseba Molopolodi wa ka o a phela. Gomme ka letšatši la mafelelo O tla ema godimo ga lefase. Le ge diboko tša letlalo di senya mmele wo, efela ka nameng ya ka ke tla bona Modimo.” O . . . Gobaneng? O tsebile gore o be a tlile ka tsela ye e filwego ke Modimo. Ga se a tla ka boleloko bja kereke ya gagwe, o tlile ka sehlabelo sa Modimo. Seo ke se Modimo a se nyakilego. Nnete.

⁷³ E be e le Dafida, ge a be a dutše godimo ga terone ya gagwe, gomme Nathane moprofeta o tlile ka gare gomme a thoma go utolla diphiri tša pelo ya gagwe, gore Dafida o naganne ka ditsela tša gagwe tša sebe. Efela, o be a le monna wa go loka, o bile monna ka morago ga pelo ya Modimo, eupša o be a phela le mogatša Uria, gomme e be e le phošo. Gomme ge Dafida, kgoši ya Israele a naganne ka ditsela tša gagwe, go mo gapetše go ya go diaparo tša masaka le thapelo, gobane o naganne ka ditsela tša gagwe tša sebe, go mo gafetše matolong a gagwe go rapela.

⁷⁴ E bile Jakobo, yo a forilego ngwanabo, gomme o phetše manongonongo tlase le ratswalagwe, ka dikamela, le dinku, le se sengwe le se sengwe, nako ye nngwe go tlile tlhologelo go ya morago gae, go ya morago kerekeng, le go ya morago go selo sa maleba gape. Gomme o thomile ka bagatša ba gagwe, le bana ba gagwe, le mehlape ya gagwe, eupša ge a kwele gore Esau o be a etla, o naganne ka ditsela tša gagwe, ka ditsela tša gagwe tša go fora. O forile Esau, gomme o tsebile Esau o be a le tseleng ya gagwe go kopana le yena.

⁷⁵ Gomme go na le Bakriste ba bantši kudu bošegong bjo, Bakriste ba ba ipoletšego, bao ba no go fora selo seo ba ipolelago go ba sona. Lehu le tla tla le khukhunetša go dikologa mojakole

lengwe la matšatši a, o tla ya go nagana ka ditsela tša gago nako yeo.

⁷⁶ Bjalo ka ge Jakobo a naganne ka ditsela tša gagwe, o dutše ka lehlakoreng le lengwe la nokana gomme o rapetše bošego bjohle.

⁷⁷ Ge Bakriste ba ka nagana ka ditsela tša bona, go tla ba gapela go thapelo le go tshokologo, go tla fapana, lefase le tla fapana, kereke e tla fapana, batho ba tla fapana.

⁷⁸ E be e le Moshe, a eya go theoga tsela ya kgale, ya go tlwaelega mosong wo mongwe ge a thoma go nagana ka ditsela tša gagwe. Modimo o mmiditše go ba mohlakodiši wa Israele. O dirile eng? O ile ka tsela ya gagwe, sebakeng sa go tšea tsela ya Modimo, gomme a bolaya motho. Gomme ge a be a nagana ka ditsela tša gagwe, le go palelwa mo a bego a le gona, le go phela manongonongo, o be a fetolantše bodiredi bja Morena bakeng sa mošomo wa modiši. . .

⁷⁹ Ga go pelaelo felotsoko tlase godimo ga maphotho a moya, goba ka moagong wo bošegong bjo, ke rerela banna le basadi ba bantši bao Modimo a ba bileditšego bodireding, gomme ba tšere tsela ye bonolonolo, gobane e bile le tšhelete ye ntši ka go yona. Go be go se. . . O diša dinku mola o swanetše go be o rera Ebangedi. Go bonolo kudu go tšea tsela yela ya manongonongo.

⁸⁰ Eupša ge Moshe a be a sa nagana ka tsela ya gagwe, sethokgwa se se tukago se tšweletše tseleng.

⁸¹ Modimo, romela dithokgwa tša go tuka bošegong bjo go monna goba mosadi yo mongwe le yo mongwe bao ba ka lekago go nagana ka ditsela tša bona. Tšea setoko sa bophelo bja gago. O phela bjang? Go ka reng ge Jesu a ka tla bošegong bjo? Nagana ka ditsela.

⁸² E be e le Petro yo a bego a eme, a ikhuthumatša ka boyena ka mollo wa lenaba, a rogana, a gana Jesu, ge a kwele mokoko wola wa kgale o lla lekga la boraro, go mo dirile a nagane ka ditsela tša gagwe, ka tsela ye a bego a swara Jesu. O be a bileditšwe bodireding, o be a bileditšwe go hlankela Modimo, gomme go tšere mokoko go mo dira gore a nagane ka ditsela tša gagwe.

⁸³ Ngwanešu, kgaetšedi, bošegong bjo, ke ka nako ya go lla ga mokoko go bontši bja rena, seo se tla re dira re phafoge le go nagana ka ditsela tša rena, ka tsela ye re swarago Morena Jesu. Ka go lebaka le leswa le la sebjalebja le mabodumedi ohle a go itiriša le go natha, ke nako go nagana ka ditsela tša rena le go tla morago go tsela ya kgale yeo Jesu Kriste a e gatilego ge A be a le fa mo lefaseng, tsela ya sehlabelo. Re nagane ka ditsela tša rena.

⁸⁴ E be e le Judase Iskariote, ge moprista yo mogolo a thoma go bala dithoro tše masometharo tša silibere, gomme ge a kwele go lla ga silibere yela, Judase o naganne ka ditsela tša gagwe, ka fao a rekišitšego Jesu bakeng sa dithoro tše masometharo tša silibere, o tšere thapo gomme a itekeletša yenamong.

⁸⁵ Ke a ipotšiša bošegong bjo, ge batho ba bantši fa, le go theetša bošegong bjo, ga se ba fora moagišani wa bona feela nthatana, ba dira kwano ye nyenyane e kgopamego, ke a rapela gore ge yeo e le taba, gore o tla kwa go lla ga tšhelete yela, go fihla go tla go romela matolong a gago a tshokologo. Ba bantši ba lena ba swere karolo ya Modimo ntle, ba e šomiša bakeng sa dilo ntle mo, bakeng sa wisiki, motšoko, disekerete, petrole go otlela go dikologa, mola e le ya ntlo ya Morena, ke mošomo wa gago wa potego go e fa. Nagana ka ditsela tša gago. Nagana ka yona: dithoro tše masometharo tša silibere.

⁸⁶ E be e le lešole la Moroma, ka morago ga ge a hlabile lehlakore la Gagwe gomme a bone meetse le Madi, a bone letšatši le sobela mo bogareng bja mosegare, gomme maswika a fatoga go tšwa dithabeng, go bile ka morago ga ge a bone se moo a thomilego go nagana ka ditsela tša gagwe, gomme a ipetha mo sefegeng, gomme a goelela, “Therešo, Yoo e be e le Morwa wa Modimo!” O letile nako ye telele, eupša o be a nagana ka ditsela tša gagwe.

⁸⁷ Ke a ipotšiša bošegong bjo ka lefaseng la seyalemoya, le ka go batheeletši ba ba bonalago, ge eba bontši bja lena ga le nagane ka ditsela tša lena, dilo tše le di dirilego, le dilo tše le di tlogetšego di se tša dirwa. E no ba mo gogolo go tloga e se ya dirwa, go swana le go dira se sengwe seo se fošagetšego. “Ka gore yo a tsebago go dira botse gomme a se bo dire, go yena ke sebe.” Ge o nagana ka ditsela tša gago, go ne selo se tee seo ke nago le kgonthe nka kgonago go se tsebiša go wena, bjalo ka ge moreti a boletše:

Go na le Mothopo o tladitšwe ka Madi,
A ntšhitšwe go tšwa ditšhikeng tša Imanuele,
Moo badiradibe ba phonkgetšego ka tlase ga
lefula,
Ba lahlegelwa ke patso yohle ya molato wa
bona.

Lehodu le le hwago le thakgetše go bona
Mothopo woo ka letšatšing la gagwe;
Fao a nke nna, le ge ke le mobe bjalo ka yena,
Ke hlatswe go tloša dibe tšohle tša ka.

Pina ya kgale ya Salvation Army, ba be ba tlwaetše go opela ye:

Oo, moela wola o bohlokwa,
Woo o ntirago yo mošweu bjalo ka leswele;
Ga go mothopo wo mongwe ke o tsebago,
Ga go selo eupša Madi a Jesu.

⁸⁸ Ga ke tsebe tlhwekišo ye nngwe, ga ke tsebe tsela ye nngwe, ga go selo gape seo ke tsebago go se dira, feela go ipolela dibe tša gago, loka le Modimo, hlwekiša dilo tše dinnyane nthatana; ke phukubje ye nnyane yeo e senyago diterebe.

⁸⁹ Letšatši le lengwe ke bile go dira boipolelo. Ke be ke le ka legaeng la ka gomme—gomme batho ba bangwe ba be ba ntshwenya letšatši ka morago ga letšatši, gomme ofisi ye kgolo, gomme ba be ba, ba nno ntapiša kudu, ke—ke be ke sa tsebe ke dire eng. Mafelelong, ke ikwetše boka lefase le be le khwamola bogodimo bja hlogo ya ka, ke be ke tšhogile kudu, gomme ga se ke kgone go tloga go ya dikopanong, gomme dikopano di letile, makgolo a Bakriste ba letile go rapelelwa, bana ba go babja ba lla, homme le botate ka dihoteleng le dimotheleng le balwetši ba bona gomme ba ehwa, gomme ke ile ka swanela go dula ka ofising le moemedi go molato bakeng sa yo mongwe. Gomme ba be ba nkgoromeletša go la go ja le la ngele, le godimo le fase, ke be ke sa tsebe ke dire eng. Ke be ke araba se sengwe le se sengwe, morago ba tla ntšeele thwi morago godimo ga sona gape.

⁹⁰ Gomme ke be ke ile gae go ja matena a ka. Ba mpoditše ke be nka kgona go tloga morago ga sekgalela seo, ke be ke eya go dipitšo tše dingwe tša balwetši ba ka. Gomme mogala o be o lla, e be e le mogala wa ka wa phoraebete, ke na le tirelo ya go araba. Mogatšaka o ile mogaleng, gomme o topile seamogedi, gomme o arabile, gomme ge a dirile, o sware seatla sa gagwe bokagodimo ga mogala, o rile, “Billy, ke bona boramolao gape.”

⁹¹ “Oo,” ke rile, “nka se kgone go feta go yona seripa se sengwe sa letšatši.” Ke rile, “Ke ba boditše selo sela sa go swana gape, le gape, le gape, le gape, letšatši le lengwe le le lengwe, letšatši le lengwe le le lengwe, gomme ka gona ba ya go mpitša gape?” Ke rile, “Nka se kgone go e dira! Ke tla . . . Ke no . . . Batho ba bantši kudu ba letile go rapelelwa.” Ke rile, “Ba botše ga ke ka mo,” gomme ka kitima go dikologa ka morago ga ntlo.

⁹² Gomme ge ke etla morago mo metsotsong e se mekae, mogatšaka yo bohlokwa, yo monnyane a eme mojako, o ntebeletše, gomme ke tseba se a bego a se ra ge mahlo a gagwe a kopane le a ka. O rile, “Billy, a seo e be e no ba nnete tlwa?”

Le tseba ka fao le ratago go itokafatša lenabeng, ke rile, “Oo, kgonthe, ke be ke se ka fa.”

O rile, “Eupša o be o le gona ge mogala o lla.”

Ke rile, “Eupša ke—ke be ke se ka fa ge o be o ba botša seo.” Ke rile, “Seo se be se lokile.”

O rile, “Billy, a o na le nnete ya seo?”

Oo! Ke—ke—ke—ke rile, “Ke nagana bjalo.”

⁹³ Gomme ke thomile go ya ntle, gomme ke tšere kefa ya ka, ke ile tlase go etela balwetši, ke ile ka kamoreng go rapelela leseae le lennyane, la go babja; monna o be a letile nako ye telele le leseae le. Gomme ke tsene go le rapelela, gomme ge ke thoma go bea diatla tša ka godimo ga lona, Sengwe se rile go nna, “A o ka kgona go bea diatla tša gago tša go aketša godimo ga ngwana yola?”

94 Beibele e boletše ka go Johane wa Pele 3:21, “Ge dipelo tša rena di sa re sole, gona re ne boitshepo ka go Modimo.”

95 Seo ke se e lego bothata lehono gore Kereke ya Bokriste ga e kgone go dira e ka ba eng e dirwe, ke ka gobane dipelo tša rena di a re sola ka dibe tša go se ipolelwe. Ga go bonolo go nna go bolela se, eupša ke therešo; yeo ke tsela ya go ba therešo.

96 Gomme ke thomile go rapela gape, gomme ke bone ke be ke se ka swanela go bea diatla tša ka godimo ga lesea lela. Ke rile, “Mohlomphegi, ke tla bona gore peelano ya gago e a bolokwa. O no dula fa.”

Ke kitimetše mogaleng gomme ka leletša moemedi, ke rile, “A nka bolela le wena motsotso?”

O rile, “Kgongthe, eupša baisa ba bangwe ba šetše ba ile.”

97 Ke rile, “E no dula ka ofising ya gago metsotso e se mekae.” Ke kitimetše tlase kua gomme ka ya ka kamoreng, ke rile, “Moemedi, ke nyaka go go botša se sengwe, ge o leditše lebakana la go feta, ke be ke le gona.” Ke rile, “O—o . . . Ge o leditše, o ntirile ke tšhoge kudu, ga se ke tsebe se ke bego ke se dira, ke nyakile ke lahlegelwa ke monagano wa ka.” Ke rile, “Ke bile le mogatšaka go araba ka mokgwa wola, eupša e be e le maaka, gomme ke boletše maaka go wena, gomme ke dirile mogatšaka go aketša.”

O rile, “Gabotse, o be o se ka fale feela nako yeo, Billy, mosadi o rile o be o se.”

98 Ke rile, “Ke be ke se, eupša ke kitimetše ka ntle ga ntlo le go kitimela ka morago ga ntlo go thibela go ba ka kua.” Ke rile, “Ke maaka, go le bjalo.” Ke rile, “A o tla ntshwarela bakeng sa yona?”

99 A sepela go kgabaganya lebatlo, a ntebelela thwi ka leihlong, gomme ke kgonne go bona ka mahlong a gagwe a mapududu megokgo ye mennyane e thoma go nyaganyaga, o ntšere ka seatla le go nkgokara, o rile, “Ngwanešu Branham, ke bile le boitshepo bjo bogolo ka go wena, eupša bjale ke na le bontši go feta nkile.” Gobaneng? Ge re nagana ka ditsela tša rena! Ke ile gomme ke rapeletše lesea.

100 Ke ile morago gomme letšatši la go latela, ke ile godimo leweng la ka, moo ke yago go rapela, kgolekgole, ke dutše letšatši lohle, gomme e be e gagabela e ka ba nako ya mantšiboa, e ka ba ka iri ya boraro goba ya bone ke tšwile ka leweng la ka gomme ka ema lehlakoreng la leswika le legolo le utamilego moragorago.

101 Batho ba lekile go hwetša lela lebaka la e ka ba mengwaga ye lesometlhano, ga se ba tsoge ba le hwetša. Ke ile nakong ya marega, ke ba bona ba le tsoma, ba nyakile go fihla go lona, gomme ka bona ka fao ba retologago, Sengwe sa semaka se ba retolla; Modimo o mphile lewa lela. Leo ke lefelo ke yago go rapela. Ka fale go aletara le se sengwe le se sengwe, ga nke ka

kgwatha selo se tee, go be go no ba ka tsela yeo ge ke le hweditše kgale kudu.

¹⁰² Gomme ke rapetše letšatši lohle, gomme ke rile, “Morena Modimo, ke dirile phošo, gomme ke dirile mogatšaka go dira phošo, o se e sware kgahlanong le yena, Morena. Hle re swarele. Ke nyaka go dula ke hlwekile pele ga Gago, Morena, gore ge ke biditšwe go rapelela bana ba Gago ba go babja, go se be le tsholo ka pelong ya ka. Ke nyaka go loka, gomme seo se a ntshola, gomme ga se ke kgone go rapelela lesea le lennyane lela. A O tla ntshwarela?” Gomme ke rapetše gomme ke llile ka fale go tloga e ka ba ka iri ya bošupa mosong wo mongwe go fihla e ka ba ka iri ya boraro goba ya bone morago ga sekgalela seo.

¹⁰³ Go na le leswika le legolo le robetše mo molomong wa lewa, gomme le lebana le bohlabela, moragorago ka masoding le dithokgwa. Gomme ke a tšwa, ka namela godimo ga leswika le, le go phagamišetša diatla tša ka godimo le—le go no tumiša Morena. Gomme ke be ke eme fale ke nagana ka ditsela tša ka, ke naganne, “Morena, gobaneng nka tsoge ka dira selo se sebjalo? Gobaneng monna a ka tshwenyega kudu? Eupša ke thabile kudu gore O a nthata, gore O ntirile ke nagane ka yona, gore O e utolotše go nna, gore O mpoditše ke be ke le phošo, seo se ra gore O nyaka ke dira gabotse, gore O a nthata.”

¹⁰⁴ O swanetše go leboga Modimo ge A go sola bakeng sa dibe tša gago le dilo tša gago, bjalo ka ge o nagana ka ditsela tša gago.

¹⁰⁵ Gomme ge ke be ke eme kua ke Mo tumiša, ka morago ga ge ke bile le kgotsofalo gore O be a ntebaletše, gomme Lengwalo la tla go nna, gomme ke rile, “Morena, go bile nako ye nngwe yeo O utago Moshe ka mphatšeng wa leswika, gomme ge O feta, o rile Go bonagetše boka mokokotlo wa motho.” Ke rile, “O bile mogau kudu go nna go dikologa lefelo le, a go ka direga gatee gape, Morena? Go no ntira ke tsebe gore. . . Ke tšere mpho ya ka gomme ka thoma go ya aletareng, gomme ke ile gomme ka boelanywa, gomme morago ka tla morago go neela mpho ya ka go ya ka Lentšu la Gago. Ge O ka ntshwarela, feta kgauswi le nna, Morena, gomme a nke ke Go bone.”

¹⁰⁶ Ga ke tsebe gore le dumela se gakaakang mo lefaseng la seyalemoya, le ka no mpitša lehlanya ka morago ga se, seo se lego gare ga lena le Modimo: Ge ke boletše seo, godimo go la nngele la ka, sekgala se sennyane, feela e ka ba boka Pilara yela ye nnyane ya Mollo le e bonago seswantšhong, phefo ye nnyane e ile ya dikologa ka dithokgweng, ya tla thwi fase gomme ya tokologela thwi go mpheta ka mokgwa woo, ke ile pele tlase go kgabola dithokgwa.

¹⁰⁷ Ke phagamišeditše segalontšu sa ka godimo, ke llile gomme ke llile. Ke goeditše go Modimo gomme ke rile, “Ke Go rata ka pelo ya ka yohle, Morena. Ke thabile kudu gore O Modimo wa go araba thapelo, le go lebalela bona ba ba tla retologelago go

Wena ka pelo ya bona yohle gomme ba sokologa, ba bitša Leina la Morena.”

108 “Yo a tla khupetšago dibe tša gagwe a ka se atlege, eupša yo a ipolelago dibe tša gagwe o tla ba le kgaogelo.” Bohle re hloka . . . ge re sa nagana ka ditsela tša rena.

109 Pele tirelo ya phodišo e thoma gosasa bošego, a re naganeng ka ditsela tša rena ge re rapela, ge re inamiša dihlogo tša rena.

110 Lena ka lefaseng la seyalemoya, ke le biletša go se feela bjale: Nagana ka ditsela tša gago. Nagana a se o se dirilego goba se o sego wa se dira. Kgobela mantšu a a sego makae a go kgaoga, a nke e bolele se: “O Morena, ntshenkeng, nteke, gomme ge go ka ba selo e ka ba sefe sa ditšhila ka nna, e ka ba eng yeo e lego phošo, ntshwarele, Morena, a nke ke ye ka boswa, a nke ke ye ka boswa gape. Ke ipolela dibe tša ka Leineng la Jesu Kriste, ke bolela gore ga ka loka, eupša ke tla ka toko ya Gagwe ke kgopela tebalelo ya dibe tša ka.”

111 Ka go batheeletši ba ba bonalago mo, lešaba le legolo le ka mo bošegong bjo, Bakriste goba badiradibe, ge ke be ke bolela, a le be le nagana ka ditsela tša lena? Gomme o rata go retollela maoto a gago gape go bophelo bja go felela bja sehlabelo? Go bonolo kudu go Bakriste go ba bjalo, oo, go dikadika kudu, go no hlokomologa go rapela, go hlokomologa go paka, go hlokomologa go dira se se lokilego; ga ra swanela go dira seo. Ge seo se go sola, gomme o na le tsholo ka pelong ya gago bošegong bjo, gomme o tla hlologela lentšu le lennyane la thapelo le bolelwe legatong la gago, a o ka phagamišetša diatla tša gago godimo, wena mo ka go batheeletši ba ba bonalago? Modimo a go šegofatše. Ke mo gobotse. Ke mo gobotse. Gohle go theoga go kgabola, godimo ka bophagamong bao ba . . . Modimo a le šegofatše.

112 “Go tla hola eng,” o a bolela, “Ngwanešu Branham?”

Phagamišetša seatla sa gago godimo nako ye nngwe gomme o bone ka fao go kwagalago.

113 Gomme lena ka lefaseng la seyalemoya, ntle kua, papa ntle kua kgauswi le seyalemoya, mme a dutšego go kgabaganya kua a roka, wena fao ka sepetlele, na o itlhahlobile ka Lentšu go le bjalo?

114 Wena yo a nago le bolwetši ka lepeng la geno, wena yo a nago le mošemane wa go hlhlathatha, a o—a o boletše le yena, mosetsana yo a sa obamelego Modimo, a o boletše le bona, bea matsogo a gago go ba dikologa, goba a o sa tšwa go e hlokomologa o letetše morutiši wa sekolo sa Lomorena go e dira? Modimo o file *wena* ngwana, ke mošomo wa gago go bolela le bona. Ge go le, a o ka se bee diatla tša gago godimo feela bjale? E re, “Morena, nkgopole, bjale ke nagana ka ditsela tša ka, gomme ke retollela maoto a ka go mabopaki a Gago, ke tla morago.”

¹¹⁵ Mohlomongwe o bile le boitemogelo bja kgonthe, pelo ya gago e be e tuka thwi morago ga ge o amogetše Moya wo Mokgethwa ka bophelong bja gago, gomme soulo ya gago e be e eswa, eupša *ka mokgwa wo mongwe gape*, o tlogile go Wona, Wona ga se wa tsoge wa tloga go wena, eupša o tlogile go Wona, gomme o tla rata go ba le thabo yela yeo o kilego wa e tseba le Modimo, ge o nyaka yeo, phagamišetša seatla sa gago godimo, gomme o re, “Modimo, bušetša go nna thabo ya phološo ya ka.”

¹¹⁶ Gomme bjale ntle go kgabola batheeletši ba ba bonalago, go no ba tše ntši, diatla tše ntši godimo. “Bušetša go nna thabo ya phološo ya ka.” Bjale a re senkeng dipelo tša rena gomme re bone ge eba go ne e ka ba eng ya phošo. Gomme ge re rapela, ge ke rapela, lena mo, le ka nageng ya seyalemoya gape, senkang pelo ya lena gomme le kgopele Modimo go le lebalela. Gomme re tla thwi tlase go tirelo ye kgolo bjale ka thapelo. A re rapeleng.

¹¹⁷ Morena, O Modimo yo Mogolo, Elohim yo Mogolo, Jehofa, Yo a thuthupišitšego pele ka menwana ya Gago le go ngwala melao, Wena Yo a hemilego go tšwa dinkong tša Gago gomme diphefo di omišitše Lewatle la go Hwa, Wena Yo o ilego wa kgokološetša morago mabopo a noka ya Jorodane gomme wa mo katološa go putla tsela yeo bana ba Gago ba bego ba ka e tshela mo nageng ye e omilego, Wena Yo a tsošitšego Latsaro go tšwa bahung, o tlišitše Daniele go tšwa legolong la ditau le bana ba Bahebere go tšwa leubeng la mollo, romela Moya wo Mokgethwa wa Gago bošegong bjo go kgabola Tennessee le dikgao tšohle tikologong, gomme a nke re nagane ka ditsela tša rena bjalo ka ge Moya wa Modimo yo a phelago o šoma ka rena.

¹¹⁸ Morena, ge go na le sebe se se itšego ka go rena, re a rapela gore O se tloše maphelong a rena, re nyaka go hloka tsholo, ka gore go ngwadilwe: “Kagona ga go sa na go lahlwa go bona bao ba lego ka go Kriste, bao ba sa sepelego ka morago ga nama, eupša ka morago ga Moya.” Efa, Morena, gore ba bantši basepedi ba nama bošegong bjo, ba lebeletše ka morago ga dilo tšeo leihlo le kgonago go di bona, a nke ba retologe le go amogela tumelo ka pelong, ye e sa kgonego go bonwa, ka gore ke bohlatse bja dilo tše di sa bonwego. A nke ba amogele Jesu feela bjale go tla ka gare le go tšea taolo ya bobona ka moka.

¹¹⁹ Re a rapela, Morena, gape, bakeng sa balwetši le batlaišwa, bao ba hlokago, ntle ka lefaseng la seyalemoya, le ka go batheeletši ba ba bonalago, batho mo godimo ga maako, le godimo ga ditulo, le—le go robala godimo ga dikhote, le eng gape, re rapela ka tlhokofalo, Morena, bakeng sa bona gore O tla ba fodiša. Gomme ke a dumela gore O tla e dira.

¹²⁰ Ka gore letšatši le lengwe, O be o feta mohlare, gomme go be go se kenya godimo ga wona, gomme O rile go mohlare wola, “Ga go motho a jago go tšwa go wena,” gomme letšatši la go latela o be o pona. Gomme O rile, “Ebang le tumelo ka go

Modimo.” Re ka kgona bjang go ba le tumelo ge dipelo tša rena di re sola? Eupša ge dipelo tša rena di sa re sole gona re ne kgonthe gore Modimo o a kwa.

¹²¹ Gona, Morena, tšea thapelo ya rena bakeng sa balwetši bošegong bjo, gomme ke re go bolwetši, thaba ye yeo e lego pele ga bona: Tloga, Leineng la Morena Jesu!” A nke e pone, a nke motho yo mongwe le yo mongwe a babjago a fodišwe, a nke motho yo mongwe le yo mongwe wa sebe a lebalelwe, a nke mošemane goba mosetsana yo mongwe le yo mongwe wa go hlhlathla a tlišwe morago go Modimo gape bošegong bjo. E fe.

¹²² A nke ditirelo tše tharo tše di latelago mo di tliše pele ye nngwe ya tšhollelo ye kgolokgolo, gore go tla ba le tsošetšo ya fešene ya kgale e phulegago ntle go kgabola Tennessee fa. Bogare bjo bogolo bjo bja bodumedi mo go swana le Kholetšhe ya Lee, le a mantši a mafelo a mangwe a magolo, a nke fao go tle ditsošetšo tše di tlogo go no tukiša dipelo tša bona, dikete tše ntši di tlišwe go Kriste. A nke e thome bjale, Morena, le go phatlalala go kgabola lefase, pele ga go Tla ga Morena Jesu, ge dinako tša go pitlagana, le ntwa, gomme kgudi e tla ba fase, gomme re ka se tsebe ke tsela efe go ya, eupša ba sepela ka dintikodiko. A re Mo hwetšeng bjale Yo e lego Thušo ye e lego gona ka nako ya mathata. Ka gore re a e kgopela, Leineng la Gagwe, le bakeng sa letago la Gagwe. Amene.

¹²³ A le a Mo rata? Ka go batheeletši ba ba bonalago, a le ka phagamišetša diatla tša lena godimo, le go re, “Ke a Mo rata?”

¹²⁴ Re fe tšhune, *Ke A Mo Rata*, le a tseba, “Ke a Mo rata, ke a Mo rata,” le a tseba. A re opeleng pina ye botse ye mmogo mo ka go batheeletši ba ba bonalago le ka go batheeletši ba seyalemoya:

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo Khalibari.

Ke A Mo Rata. Go lokile, a le tla e opela le nna bjale? Go lokile. Moetapele wa pina o kae?

Ke a Mo rata, ke . . .

O ka no ema . . .

. . . Yena

. . . ntle ka go batheeletši ba ba bonalago.

. . . ratile pele . . .

Batheeletši ba seyalemoya: Mme, wena le papa fale mo ntlong, emelelang, phagamišang diatla tša lena.

. . . lefetše phološo ya ka
Godimo ga mohlare wa Khalibari.

¹²⁵ Wena kua ka botsenong ka koloi ya gago e bulegile bjale, wena ntle o otlelago godimo ga tselalephefo, gobaneng o sa no

tepogela ka thoko, wa opela ye le rena. Wena, lesogana fale le—le lekgarebe la gagwe, le wena, mothepana le lesogana, gobaneng o sa dire, ge le se Bakriste, gobaneng le sa ineele go Kriste feela bjale? Ke eng mohola wa go leka go dira legae ntle le go ba legae la Bokriste? E thome bjale. E thome, yo mongwe le yo mongwe, mogohle. E opeleng gape le rena bjale. Ge re phagamišetša digalontšu tša rena go Modimo, a re phagamišetšeng diatla tša rena go Modimo. Go lokile.

Ke a Mo rata, ke a Mo rata
 Gobane O nthatile pele
 Gomme a lefela phološo ya ka
 Godimo ga mohlare wa Khalibari.

¹²⁶ Badumedi bohle, a re nong go re go Morena yo mogologolo, ka pelo, “Tumišang Morena.” A re e boleleng: “Tumišang Morena!” Oo, a seo ga se le dire le ikwele gabotse? A Lentšu ga le no ba mohuta wa go le gohla, go le dira le ikwele go fapana? Bjale molaetša o fedile, re tumiša Morena bjale.

¹²⁷ Ke Bakriste ba bakae ba bonalago? A re boneng diatla tša lena, bohle bao ba lego Bakriste, phagamišang diatla tša lena. Oo, nna! E ka ba feela lekgolo la phesente. A re e opeleng gape gona, o šišinye diatla le moagišani wa gago, yena pele ga gago, ka lehlakoreng la gago, lehlakore le lengwe le le lengwe, le ka morago ga gago, morago le pele, šišinyanang diatla seng ge re opela, *Ke A Mo Rata*. Etlang pele bjale, ge pina . . .

Ke . . . 

59-0706 Go Nagana Ka Ditsela Tša Rena
Church Of Faith
Cleveland, Tennessee U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org